

En defensa do traballo xusto e ilusionante dos servizos de normalización lingüística (SNL)

Os/as traballadores/as de normalización lingüística dos concellos galegos, e no seu nome a Coordinadora de Traballadores/as de Normalización da Lingua (CTNL), ante a situación xeral do proceso de fomento do galego e dos servizos de normalización lingüística (SNL), temos que expresar:

- **Os servizos de normalización lingüística (SNL) son os departamentos que desenvolven o traballo técnico de cara a avanzar no consensuado proceso de normalización da lingua galega.** Un traballo necesario, xusto e ilusionante de fomento do galego no nivel de contacto máis directo coa cidadanía. Os SNL contribúen a difundir do xeito máis próximo entre a poboación, por exemplo, as creacións culturais galegas, desenvolven accións de dinamización e fomento da lingua, achéganlle á poboación máis nova alternativas de lecer en galego, difunden e xestionan os cursos de formación en lingua galega, velan pola calidade lingüística e comunicativa das institucións, velan pola garantía dos dereitos lingüísticos, difunden materiais, recursos e servizos en lingua galega, procuran a formación lingüística dos/as traballadores/as públicos/as e da cidadanía en xeral, ofrécenlle asesoramento lingüístico a empresas e asociacións, etc.
- **Aínda que a situación actual dos SNL é moi precaria e, polo tanto, moi mellorábel, chegar a ela significou un proceso de anos que non podemos botar por terra.** Por iso, para non desbotar o conseguido até agora e para procurar mellorar a situación, cómpre o compromiso de todas as entidades públicas, que nun momento de dificultade económica como o que estamos a vivir non poden caer na irresponsabilidade de desprotexer o noso maior patrimonio común, a lingua galega.
- **A Xunta de Galicia suspendeu en 2011 as axudas ao fomento do galego nos concellos, e isto non é, desgrazadamente, un feito puntual,** xa que se enmarca nunha política de minorización e desprestixio da lingua galega por parte do goberno que debe ser freada canto antes. Esta irresponsábel decisión da Xunta supuxo a paralización e redución de múltiples actividades de dinamización por parte dos concellos e, polo tanto, unha redución de servizos e actividades dirixidas á cidadanía. Ademais, é incoherente que a SXPL presente a Rede de Dinamización Lingüística para, supostamente, apoiar e colaborar coas entidades locais na promoción da lingua, ao mesmo tempo que rebaixa as xa moi escasas e precarias axudas que se veñen convocando desde hai 20 anos, e que, polo tanto, se provoque o peche de servizos de normalización lingüística e a non creación doutros novos.
- **A situación dos departamentos técnicos de normalización lingüística dos concellos é moi grave.** Dos arredor de 60 existentes, a metade permanecían abertos dependentes do convenio de colaboración que a Deputación da Coruña viña mantendo nos últimos anos con concellos da súa provincia. Ao se rebaixar drasticamente esta axuda, moitos SNL xa pecharon e outros están en grave perigo de desaparición.
- **Todo isto demostra a situación de precariedade e inestabilidade total, o que nos leva a reiterar a proposta dun outro modelo de organización dos servizos de normalización lingüística** na procura da planificación territorial e a estabilidade, de tal xeito que se cree unha estrutura real e coordinada de servizos técnicos para a normalización lingüística que abranga o conxunto do país e que, polo tanto, sexa máis eficiente, consiga mellores resultados e rendibilice mellor os recursos públicos. Neste sentido, a CTNL reitera a súa proposta de coordinación de SNL, agrupados nun consorcio interadministrativo, con unidades técnicas multidisciplinares a nivel comarcal.
- **Por estas razóns, dirixímonos á Xunta de Galicia e a diversas entidades para que coñezan esta situación,** e á Real Academia Galega, ao Consello da Cultura Galega, ao Instituto da Lingua Galega, aos departamentos de galego das tres universidades e a diversas entidades privadas de defensa da lingua para solicitarles que apoien este comunicado e as solicitudes que contén.

E dirixímonos tamén a todos os concellos galegos para solicitarlles que apoien e aproben as seguintes resolucións:

1 Demandámosslle á Xunta de Galicia que asuma a competencia de impulsar e coordinar os servizos de normalización lingüística (SNL) e de colaborar co fomento do uso do galego nos concellos, para o que debe dedicar os suficientes recursos económicos e materiais de xeito estable. Solicitamos, pois, que se cree unha estrutura real e coordinada de SNL que abranga o conxunto do país, para o que se propón como

posibilidade a figura dun consorcio interadministrativo.

2 Instamos á Xunta de Galicia e a todas as entidades públicas galegas a que adquiran o compromiso real de fomentar o uso e prestixio da lingua galega, con prácticas coerentes con ese compromiso e coa posta en marcha de medidas decididas e eficaces na procura da normalización lingüística. O noso concello tamén adquire este compromiso.


3 Comprometémonos a procurar acadar a porcentaxe do 0,3% do orzamento xeral do concello para o fomento da lingua galega, investindo estes recursos en servizos técnicos para planificar e xestionar o proceso de normalización lingüística, e en accións de fomento do galego no municipio.

4 Solicitámosslle á Xunta de Galicia que tamén adquira ese compromiso e que, polo tanto, tamén procure acadar

a porcentaxe do 0,3% do seu orzamento para o fomento da lingua galega, investindo ese orzamento nunha estrutura de SNL coordinada que planifique e xestione o proceso, e en accións dinamizadoras do galego no conxunto da sociedade, e que o faga de xeito planificado, coordinado e colaborativo con outras entidades e administracións públicas, para así investir esos escasos recursos dispoñíveis do xeito máis eficiente posible.

Valdeorras, Pontevedra, Silleda de Caselas, Teo, Vimianzo...
Concellos de Betanzos, Cee, Carballo, Castro Caldelas, Curtis, Vilalba, Narón, O Barco de Valdeorras, Pontevedra, Silleda de Caselas, Teo, Vimianzo...
Real Academia Galega (RAG)
Instituto da Lingua Galega (ILG)
Deputación de Lugo
Departamento de Filoloxía Galega e Latina da Universidade de Vigo
Departamento de Filoloxía Galega da Universidade de Santiago de Compostela (USC)
Departamento de Galego-Portugués, Francés e Lingüística da Universidade da Coruña (UDC)
Asociación de Escritores/as en Lingua Galega (AELG)
Associação Galega da Língua (AGL)
A Mesa pola Normalización Lingüística
Apoián este comunicado:

info@ctl.org | www_CTL.org
Coordinadora de Traballadores/as de Normalización da Lingua (CTL)



En defensa do traballo xusto e ilusionante dos servizos de normalización lingüística (SNL)



CTL

Coordinadora de Traballadores/as de Normalización da Lingua